

# Cyfamod hedd, cyfamod cadarn Duw

## Caneuon Ffydd: Rhif 207

---



---

Cyfamod hedd, cyfamod cadarn Duw,  
ni syfl o'i le, nid ie a nage yw;  
cyfamod gwir, ni chyfnewidir chwaith;  
er maint eu pla, daw tyrfa i ben eu taith.

Cyfamod rhad, o drefniad Un yn Dri,  
hen air y llw a droes yn elw i ni;  
mae'n ddigon cry' i'n codi i fyny'n fyw,  
ei rym o hyd yw holl gadernid Duw.

Cyfamod cry', pwy ato ddyry ddim?  
Nid byd na bedd all dorri'i ryfedd rym;  
diysgog yw hen arfaeth Duw o hyd,  
nid siglo mae fel gweinion bethau'r byd.

Er llithro i'r llaid a llygru defaid Duw  
cyfamod sy i'w codi i fyny'n fyw,  
a golchi i gyd eu holl aflendid hwy,  
a'u dwyn o'r bedd heb ddim amhuredd mwy.

EDWARD JONES, 1761–1836

### MYFYRDOD

Datguddia Duw ei hun inni fel Duw sydd yn gwneud cyfamod â'i bobl. Gras Duw sydd wrth wraidd ei holl gyfamodau â dyn drwy'r Beibl a thros amser. O'r ardd yn Eden hyd yr ardd honno ym Mharadwys, mae yna waed wedi ei dywallt yn dystiolaeth gyson o ras Duw nes i'r drefn gael ei digoni yn aberth Crist: 'Oherwydd y mae Crist, ein Pasg ni, wedi ei aberthu' (1 Cor. 5:7). Dyma gyfamod terfynol, cadarn ac unplyg – 'nid oedd ef yn "Ie" ac yn "Nage"'. "Ie" yw'r gair a geir ynddo ef' (2 Cor. 1:19). Nid oes gan Edward Jones, Maes y Plwm, ddim prinder deunyddiau i sôn amdanynt, felly yn yr emyn hwn y mae ef ei hun yn ei alw'n 'Cyfamod Gras', gyda holl rychwant y Beibl o'i flaen. Yn wir, mae ganddo naw pennill yn y testun gwreiddiol o'r emyn hwn. Fe ddetholwyd

pedwar yma, sef y ddau gyntaf a'r ddau olaf. Mae'n rhaid dethol yn aml er mwyn cael emyn i'w ganu, a dethol dro arall er mwyn cael gwared â phenillion eilradd. Ond mae'r naw yma yn rhai arbennig i gyd. Sylwch ar grefft arbennig ac odlau cyrch y pennill hwn a adawyd allan:

Does bwlch yn hwn, fel modrwy'n grwn y mae;

A'i glwm mor glos, heb os ac oni bai:

Nid all y plant ddim gwerthu eu meddiant mwy;

Mae gan Dduw gylch, a'u deil, o'u hamgylch hwy.

Hwn fu'r emyn cyntaf yng nghasgliad y Methodistiaid Calфинаidd o 1869 ymlaen, ac nid heb gwyno y bu'n rhaid iddo ildio ei le! Fel hyn y sonia O. M. Edwards amdano yn ei gylchgrawn *Cymru*, 21: 'Yr oedd emyn cyntaf hen lyfr hymnau'r Methodistiaid yn agoriad ardderchog: y mae emyn Edward Jones, Maes y Plwm, mor nodweddiadol o gynulleidfa o Galfiniaid, ac efe yw'r mwyaf mawreddog o holl emynau Cymru.'

Roedd Edward Jones yn 26 mlwydd oed erbyn iddo ef gael profiad o dröedigaeth gan dderbyn amodau'r Cyfamod â Duw, sef dod i berthynas â'i Fab, Iesu Grist. Ond pymtheg oed oedd Daniel Jones ei fab yn ysgrifennu llw ac yn cyfamodi â Duw yng nghapel bach Llyn y Pandy ger yr Wyddgrug lle'r oedd ei dad yn cynnal ysgol. Braf fuasai dyfynnu'r cyfan ohono, ond gwnawn y tro ar ychydig fel hyn er mwyn dangos arwyddocâd gwneud 'cyfamod' yng ngeirfa a phrofiad Calfiniaid y dydd: 'Yr wyf fi Daniel Jones, fab Edward Jones . . . ar ôl i blant yr ysgol hon, a'm tad innau, fyned adref o'r capel . . . yng ngŵydd y Duw mawr hollbresennol . . . yn cymryd fy llw . . . fy mod o hyn allan . . . yn ymroddi i fyw i Dduw mewn gwirionedd, a bod yn llestr cysegredig iddo . . . a hyn a wnafr trwy gymorth Duw . . . A'm holl ffaeleddau, yr wyf yn erfyn ar Dduw eu maddeu. – Amen.' Yr oedd yn genhadwr ar Fryniau Casia ymhen pymtheng mlynedd arall ac yn marw yno o'r dwymyn ymhen llai na blwyddyn wedyn.

## **GWEDDI**

O Dad, gwyddom nad oes dim yn sicr yn y byd hwn, ac er bod gwedd wael ar Eglwys Iesu Grist yn ein gwlad, diolchwn fod dy Gyfamod Gras yn dal i sefyll:

'mae'n ddigon cry' i'n codi i fyny'n fyw,

ei rym o hyd yw holl gadernid Duw.' Amen.